



Synfocity = 340

mail us at : synfo@bsnl.in, synfo@yahoo.com - Phone - 2314648

12th May, 2011

□ Synod Social Front Committee

May thla chhung hian Mizoram Presbyterian Kohhran Synod hnuai Board leh Committee hrang hrangte an thukhawm mek a. May 10 (Thawhlejni) khan nilengin Synod Social Front Committee an thu.

Synod Social Front Committee thutkhawm vawi 169-na hi Synod Moderator Rev. C. Lalsangliana kaihhruiin Committee thu ngaihtuah 17 zingah hnam dang sumdawna atana Mizo hming hawhtir lo tura kohhranho ngenna, Mahni anpuite lakah leh inneihna huang pawn lama mipat hmeichhiatna hman kohhranin a pawm lohna thupuan, HIV/AIDS policy, CYMA CADS-a Social Front rawngbawina thlirho leh MLTP Research Team thu te chu a pawimawh leh langsar zual an ni.

Executive Secretary, Social Front changtu Rev. Lalzuithanga report-a a lan danin-

- 1) Aizawl khawpui chhungah Mizo hming hawha hnam dang sumdawng- Iron Rod zuar 27 leh nepnawi dawr siam 33 an awm.
- 2) SEC thurel bawhzuiin Synod Social Front hian Partnership Fund atanga Special Budget a neih atangin Home leh Centre 14 hnenah December 2010 khan tanpuina sum sem a ni a, sum sem ral zat hi Rs.4,80,000 a ni.
- 3) September 2010-April 2011 chhung khan CYMA CADS hmalakna hnuai Synod Social Front-in counselling a pek tawh zat chu mipa 496, hmeichhia 271 an vaiin mi 767 an ni. Heng zinga a tam ber hi ruihlo zuar leh hmang sualte an ni.
- 4) Synod Social Front hian mahni anpui kawp thin mi 47-te chu chhui zuiin Pathian thu hmanga anmahni tanpuina leh chhanchhuahna kawng chi hrang hrangin a kalpui mek baw a ni.

□ Synod Pastoral Committee

Nimin (May 11) khan Synod Pastoral Committee, kum 2010-2012 term thutkhawm vawi 1-na J.M. Lloyd's Hall, Synod Office-ah neih a ni.

Pastoral Committee meeting hi Synod Moderator Rev. C. Lalsangliana a kaihruai a, Senior Executive Secretary. Pastoral changtu Rev. Vanlalzuatan report a pe a, thu ngaihtuah tur (agenda) 6 chhawpchuah a ni.

Synod 2010-in a lo pawm tawh angin Presbytery thar pahni- Karbi Anglong Mission Field, Aizawl Chhimthlang Presbytery te chu Rev. C. Lalsangliana, Synod Moderator-in a hawn tawh thu leh, Tuivawl Presbytery pawh May 21, 2011-a hawn leh tur a nih thu te, Presbyterian Hospital, Durtlang leh Aizawl Civil Hospital-ahte chaplain pahni ve ve dah fel an nih thu te tar lan a ni a. Presbyterian Hospital (Durtlang)-ah Rev. C. Lalbiakhluna leh Rev. K. Lalfakzuala te dah an ni a, Civil Hospital (Aizawl)-ah Rev. Thanhnuna leh Rev. V.L. Krawschuanmawia te dah an ni baw.

Pastor quarters thar 12 sak tura ruahman a nih bakah SEC 233-in English Congregation Pastor hna thawk tura Rev. L. Lalrinkima, Principal, Missionary Training College a ruat thu te, 3rd IR Battalion-ah an rawn dil anga chaplain hna thawk tura Rev. K. Lalrongheta (Rtd) ruat a nih thu te pawh inhriattir a ni.

Synod Pastoral Committee hian Synod hnuai Pastor hna thawk lai mek M.Th zir chhunzawm dilte chungchang a ngaihtuah a. Diltu hi Pastoral hnuai mi 8 leh Ramthar Board hnuai mi 10, an vaiin 18 an ni.

Pastoral Committee meeting-ah hian member 115 zinga 96 an tel thei a ni.

May 18 & 19-ah Finance Committee an thukhawm ang a, Synod Executive Committee (SEC) chu June 7-9 chhungin an thukhawm baw ang.

□ Synod Mission Board

♦ Synod Mission Board chuan Muslim zinga rawngbawl dan tur ngaihtuahin May 12 & 13 hian **Consultation on Camel Method (The way to heaven through the light of Ku'ran)** an nei. Khawvel hmun hrang hrangah hetiang Camel Method an tih hi Muslim zinga rawngbawlna atan an hmang thin. Consultation neihpui tur hian Bangladesh atangin Rev. S. Baroi, Evangelist, Worldwide Muslim Ministries a lo kal a, mosolman zinga rawngbawl dan leh hma lak dan turah awmze nei taka ngaihtuahna lo seng tawh leh thawk tawh thin a ni.

Consultation hawna inkhawm hi vawiin (May 12) chawhma dar 10:00 khan J.M. Lloyd Hall, Synod Office-ah neih a ni a, programme hi Upa R. Lalmalsawma, Synod Mission Board Coordinaor-in a kaihruai a ni. Rev. Lalzuithanga, Executive Secretary-in keynote address a pe a, Pu Lalhmingthanga, Mission Promoter-in consultation-a lo kal te hnenah lawmthu sawiin inhmelhriattirna a nei a ni. Resource person Rev. S. Baroi hnen atangin thu kam keuna ngaihthlak a ni a, chawhnu lamah sawihona leh zawhna & chhanna hun hman a ni. He consultation hi Synod Mission Board member-te bakah Milit Samiti te, Tualchung Kohhrana Hnamdang zinga rawngbawltu hrang hrangten an chhim a ni.

Naktuk (May 13) hian Trainers' Training/Seminar neih zui a ni leh dawn a, Rev. S. Baroi hovin hun hman leh a ni ang. Training/Seminar-ah hian Masihi Sangati Evangelist-te leh tualchhunga rawngbawltute tel theuh tura sawm an ni. Zirhona atang hian a that leh that loh Board hotuten an thlir zui leh ang a, Mizoram chhunga hman atan a tha ve ang em tih an la ngaihtuah leh dawn a ni.

♦ Arunachal East lama thawktuten school chawh laiin khaw hrang hrangah Chanchin Tha hrilin an feh chhuak a. Hmun thenkhatah chuan an thusawi an ngaihtla duh hle a, hmun thenkhatah chuan Pathian thu sawi tawh lo tura tihna lehkha te hial pek an ni. Tawngtainaa hre reng turin Arunachal East-a thawktuten kohhranhote an sawm a ni.

♦ Partnership Meet

Synod Partnership Committee vawi 13-nain a rel angin **May 17 (Thawhlejni)** chawhnu dar 1.00 hian Synod Partnership Committee hotute leh Synod hnuai affiliated para church 9 hruiute chuan Synod Committee Room No. 1- ah intawkhawmna (Partnership Meet) an nei dawn a, hetah hian rawngbawltu dan tur leh thil tul dangte an sawi ho ang.

Partnership Meet-ah hian para church tin atangin hruiute 3 theuh tel tura beisei an ni a, Synod Partnership Committee hruiute pawh tel kim vek tura beisei an ni. *Programme kimchang pheh lehlamah tarlan a ni.*

♦ May 14 & 15 hian Ramthar Campaign, Phullen Kohhranah neih a ni dawn a, hemi neihpui tur hian Rev. Lalzuithanga, Executive Secretary a kal ang a, zaia rawngbawlna nei turin PBK Liankhuma a kal baw ang.

□ Zin

♦ May 13 & 14 hian Rev. Mangchhuana Sailo, Presbyterian English School Supervisor chuan W. Phaileng-a Presbyterian English School a tlawh ang.

Contd...

- ❑ **Music**
May 17 & 18 hian Tlungvel Gate Veng Kohhranah Khuangvuak Training neih a ni dawn a, training hi Pu Lalromawia, Synod Music Instructor-in a neihpui ang.
- ❑ **Kohhran Hmeichhia**
May 14 & 15 hian Khawzawl Venglai Bial huapin Khawzawl Venglai Kohhran-ah Kristian Chhungkaw Campaign neih a ni dawn a, Central Kohhran Hmeichhe hruaitu Pi Khawlvuani, Vice Chairman; Pi K. Lalthanpari leh Pi Lalthanthangi (Committee Members) ten training hi an neihpui ang.
- ❑ **MSSU**
 - ♦ May 14 (Inrinni) hian Hunthar Kohhranah Sunday School Zirtirtu Training neih a ni dawn a, training neihpui tur hian Upa Lalchhuanawma, Zuangtui; Upa Laldingliana Sailo, Ramhlun Venglai leh Pu Lalthahluna Ralte, MSSU Asst. Coordinator te an kal ang. Zan Pathian biak inkhawmah Pu Lalthahluna Ralte-in fanau enkawl (child evangelism) chungchang thuchah a sawi ang.
 - ♦ May 14 (Inrinni) hian ITI Bial huapin ITI Vengchhak Kohhranah Sunday School Zirtirtu Training neih a ni dawn a, training neihpui tur hian Upa K. Vanlalngbaka, Ramhlun East; Upa K. Zoremsanga, Kulikawn leh Upa K. Lalremruata, MSSU Office Assistan- te an kal ang. Zan inkhawmah Upa K. Zoremsangan 'Fanau enkawl chungchang' tih thupui hmangin thuchah a sawi ang.
- ❑ **Kristian Thalai Pawl**
May 14 & 15 hian Bilkhawthlir Bial huapin Kualmawi Kohhranah Leadership Training neih a ni dawn a, training neihpui tur hian CKTP hruaitu T/Upa Zothangzuala Chhangte leh Pu R. Lalhmingthanga, Committee Members te an kal ang. Hemi chung vek hian Bilkhawthlir North Bial huapin Meet & Branch hruaitute pual Retreat neih a ni dawn a, hemi neihpui tur hian CKTP hruaitu Dr. Samuel Vanlalhlanga leh Pu Lalhruaizela, Committee Members te an kal bawk ang.
- ❑ **Synod Bookroom**
May 16 (Thawhtanni) zan hian Ramthar North Branch KTP nen tangkawpin Literature Nite an buatsaih dawn a, Pu Lalniliana, Synod Bookroom Manager-in thuchah a sawi ang a, Tv. Lalzarmawia, Sales Promoter-in slide show a entir bawk ang. Literature Nite-ah hian Synod Bookroom chuan an bungrua neih ang ang te an pho chhuak thin a, man tlawm zawka hralh thin a ni.
- ❑ **Lehkhabu tlangzarh**
Nimin (May 11) khan Zosaphluia Building, Mission Vengah Revd. Chuauthuama lehkhabu ziah, Zotawng Bible Dictionary tih chu Dr. Lalchhuanlian a tlangzarh. Revd. Chuauthuama hian he lehkhabu hi kum 2004 atang khan a lo buaipui tan tawh a ni a, phok 1,282 laia chhah a ni. Zotawng Bible Dictionary hi Rs.800/- in Synod Bookroom-ah lei theih a ni.
- ❑ **Susamachar Prasaran Programme**
May 15 (Pathianni) tlaiah Hindi Programme (Susamachar Prasaran) LPS & Zonet Cable atangin hetiang hian tih chhuah a ni ang : **Group/Choir/Solo** : Mission Veng Masihi Sangati - Rahi; **Group/Choir/Solo** : Aizawl EFCI Choir - Hum Gayenge; **Sermon** : Rev. Vanlalbela - Isu jevan data he; **Group/Choir/Solo** : College Veng Masihi Sangati - Ateba Bai Bam Sabbi Tere Sharon; **Group/Choir/Solo** : MSVT Kohhran Masihi Sangati Zaipawl - Mere Guma Hon Ko; **Stuti Geet** : Janam Dene Wale
- ❑ **Moderator Programme**
Synod Moderator Rev. C. Lalsangliana chuan tun kar tawpah hetiang hian hun a hmang ang :
 - ♦ May 12(Ningani) : Bairabi kang tuarte tlawh
 - ♦ May 13 (Zirtawpni) : Pune Diocese (CNI) nen thawhona thuthlung (Partnership Agreement) an sign ang
 - ♦ May 14 & 15 : Champhai Vengthlang & Champhai Kahrawt Kohhran tlawh

SYNOD PARTNERSHIP COMMITTEE HOTUTE
leh
AFFILIATED PARA-CHURCH HRUAITUTE
Inkawmhona programme

A hmun : Committee Room No. 1, Synod Office, Aizawl
A hun : May 17, 2011 (Thawhlejni) dar 1.00 p.m.

- | | | |
|----------------------------------|---|---|
| 1. Hruaitu | : | Rev. C. Lalsangliana,
Moderator, Mizoram Synod &
Chairman, Partnership Committee |
| 2. Inhmelhriattima
& Inlawmna | : | Rev. Lalchhuanmawia,
Secretary, Partnership Committee |
| 3. Sawi hawwna | : | Rev. Lalzuithanga,
Exe. Secretary, i/c Partnership etc., Mizoram Synod |
| 4. Thusawi tawi
Sawitu | : | Synod-in para-church te a beisei dan
Rev. Vanlalzuata,
Senior Exe. Secy., Mizoram Synod |
| 5. Sawihona | : | 1) Rawngbawl ho dan tur
2) Tul dang awm apiang |
| 6. Banna | : | Hruaitu kutah |

